

Honor pil currider Jon-Fadri Nufer

Jon-Fadri Nufer dil Club da skis Sedrun-Tujetsch ei vegnius nominaus da Swiss Ski per las concurrenzas da cuorsa liunga dils Giugs dall'organisaziun dallas uniuns da skis dallas tiaras dallas Alps. Quels han liug questa fin d'jamna a Sappada ell'Italia. La qualificaziun dil giuven Tuatschin ei succedida sin fundament da sias fetg bunas prestaziuns da quest unviern ella categoria dils juniors sut 18 onns, denter auter las cuorsas a Campra, Claustra ed ils campiadis svizzers a Sparenmoos. Jon-Fadri Nufer s'auda il mument denter ils quater megliers currider da sia categoria da vegliadetgna dalla Svizra. «Per mei ei quella selecziun il punct culminont dalla stagiun», di il currider che fa parallelmein era igl emprendissadi sco miradur. Las prestaziuns ella cuorsa liunga muossan ch'el sa unir bein la scolaziun professiunala ed il sport intensiv. A Sappada sa Jon-Fadri Nufer partir ella concurrenza singula sur la distanza da 10 km sco era ella staffetta svizra mischedada. Las duas cuorsas han liug questa sonda e dumengia.

Giugs dall'organisaziun dallas uniuns da skis dallas tiaras dallas Alps vegnan arranschai mintga unviern. Dalla partida ein sportistas e sportists d'Andorra, dalla Germania, Frontscha, Italia, Liechtenstein, Austria, Slovenia, Spagna, Tschechia e la Svizra. Duront in'entira fin d'jamna vegn purschiu concurrenzas da cuorsa liunga, siglir e la cumbinaziun nordica per las categorias dils juniors sut 16 onns, respectivamein sut 18 onns. Ella fuorma actuala vegnan ils giugs arranschai dapi la stagiun 1985/86. Da 1963 entochen 1985 vegnevan las concurrenzas organisadas sut il num Cup Berauer. Per las curridras ed ils currider ei quei la caschun da semesirar culs megliers da lur categorias da quellas diesch tiaras, quei ch'ei ina gronda sfida per in e scadin. Medemamein a Sappada han liug questa fin d'jamna cuorsas nordicas dil Cup Continental. Quei cup ei la pli aulta seria da concurrenza suenter il Cup mundial. A quellas vegn il frar da Jon-Fadri Nufer, *Cla-Ursin*, a separticipar. El appartegn al cader C da Swiss Ski. (fmr/hh)